

那文毅公奏議

那文毅公初任直隸總督奏議卷四十二目錄

卷四十二

飭緝逆黨

先文毅公初任直隸總督奏議卷四十二

上海市歷史文獻圖書館藏

男

飭緝逆黨

容安謹按 先文毅公奉

旨嚴緝逆匪雖祝劉各犯未經就獲然先後辦過不下數十起其僅止燒香歛錢者間從末減惟搜緝石佛口王姓一案不遺餘力蓋以王姓習教始自前明流毒數省故爲拔本塞源之計仰蒙

仁宗睿皇帝

特旨嘉獎、能上契

天心淨絕仙株洵屬快事

嘉慶二十年十月二十五日

奏爲遵

旨飭拏赴楚傳教之灤州人王姓究出王殿魁曾在江南
傳教現在分別提訊咨查事竊臣前經面奉

諭旨飭令查辦湖北江夏縣人樊萬興等供出赴楚傳教
住居江南儀徵縣之直隸灤州人王姓一案當在
差次派員馳往灤州會同訪查迨回省接准湖廣
總督馬慧裕湖北巡撫張映漢咨會飭緝又經臣
查有保定府同知汪洞曾任灤州熟悉該處情形

檄飭前往確查奏蒙

聖鑒在案

臣

復檢查舊案灤州石佛口村王姓最多類皆

習教十七年間拏過王烈一名解部審辦又現准

山西撫

臣

咨緝送給曲沃縣民護道榜文王如青

之子是該村王姓不止一家必須詳細週密嚴拏

務獲以絕根株節經指示各委員去後嗣據灤州

知州王仲湘會同委員候補未入流喻振恒訪得

盧龍縣屬安家樓莊人王殿魁在江南住家卽將

王殿魁并伊子王朝萬拏獲并起獲道教全書四

套并牌藥方紙一張尙無違礙字樣稟由

臣

檄司

提審據王殿魁供稱小的原籍是灤州石佛口人
順治七年祖上卽移住盧龍縣安家樓小的今年
五十二歲女人劉氏生有四個兒子長子王朝萬
次子王滿定三子王德子四子王套兒小的家世
傳清茶會卽清淨門勸人喫齋念經祖父王景文
父親王亨功乾隆三十六年在安慶府傳教犯案
把父親正法祖父發遣那時小的纔七歲後來小
的叔祖王烈同叔父王景益曾在江南傳教先後
犯案問罪小的於乾隆五十七年纔到江南傳教
先到淮安安吉村徐二疑家又到江甯府溧水縣

秦大彩之子秦過海家泗州王維善之子王添弼
南京城內人吳長庚家均傳了教因他們父親都
是小的父親徒弟故此他們也給小的做徒弟的
此外並沒別人了小的在淮安府山陽縣河下二
十四五堡蔡橋開永昌號糧食店財東係山西汾
州府介休人任盛元小的到淮安後每隔五六年
回家一遍去年十月內小的合大兒子朝萬一同
回家的小的傳教都在江南並沒到過湖北山西
等省小的家在湖北傳教的共有三人一是小的
族叔王書魯他傳的大徒弟是武昌府草北門外

打鐵的李良從一是小的族叔王泳太他的大徒弟是漢陽縣城外種菜園的陳堯一是小的族叔王興建他的大徒弟係在漢口開香舖的黃四還有一個是武昌府草北門外開菜園的王世中此外他們再有徒弟小的記不清楚了王書魯本是安家樓人搬到石佛口住十三四年前他獨自一人到江南儀徵縣傳教卽便住下在那裏成了家有一個抱養的兒子姓秦先住在儀徵城外五壩頭近日又搬進縣署旁邊居住他今年五十五六歲圓臉帶赤色大鼻子黃鬚中等身材王泳太王

興建俱在安家樓住王泳太年近五十歲高身材
長臉有麻黃鬚他本是山西犯案王紹英的胞弟
王興建年六十五六歲高身材長瘦臉連鬚白鬚
他們合王書魯三個人都是在湖北傳教可以提
質的至在山西傳教犯案的王如青是王培蒼之
子也是小的族祖已於十六年上病故他長子王
鳳太上年因王烈犯案解部監斃還有他次子小
名來子現年十六七歲小的王姓在石佛口住的
有兩支俱係在旗分東西兩院王如青是東院人
其餘在安家樓合闡家莊的係屬一支俱係民人

現在小的家起獲道書是家中舊有的並無別項
經卷藥方招牌一張是過路賣膏藥人給的等語
又據保定府同知汪洞會同盧龍縣知縣辛文止
稟稱訪得安家樓莊尙有王三樂等係教犯王紹
英之弟隨將王三樂王三畏拏獲並在伊家搜查
並無經卷圖像等物訊據王三樂王三畏同供伊
弟兄五人長兄王三省已故多年次兄王三聘又
名王紹英會看風水向在山西澤州府陽城縣娶
親住家嘉慶十五年間伊三兄王三禪前往山西
找尋王紹英十六年三月間一同回家殯葬伊母

事畢王紹英於十八年正月內仍往山西十九年正月灤州因緝拏教匪王正才把伊兄王三顧并王三畏拏獲訊明遞回本縣取保釋放伊等委係莊農度日均無習教爲匪情事王三顧旋患瘋迷於本年四月內外出不知去向伊莊亦不知有王如青其人等語臣伏查王殿魁現在供出在湖北傳教之王書魯一犯已准湖廣督臣咨曾在江蘇省拏獲其王泳太王興建二犯據王殿魁供稱俱在湖北傳教又王來子一犯係在山西傳教王如青之次子均應按名密速拏獲當開明各犯年貌

住址劄飭委員等分投密拏並將王殿魁所供在江南傳徒徐二凝等分別咨緝究辦一面仍向王殿魁詳鞫確情外至王三樂王三畏既係王紹英之弟王紹英業經山西拏獲奏辦據稱伊兄王三顧曾赴山西找尋王紹英回家於葬母事畢之後王紹英仍往山西彼時王三顧雖未偕往而現在又復外出是其行踪詭秘情殊可疑王三樂等供稱王三顧因瘋外出實難覓信自應將王三樂王三畏飛提來省提同王殿魁確行訊究且查安家樓莊王姓本係灤州石佛口王姓分支而灤州之

王烈等又係王紹英供出傳教案內經刑部審擬
分別發遣內有王際昌一犯發邢臺縣充徒王漢
卓一犯發東鹿縣充徒王秉鈞一犯發慶雲縣充
徒是王三顧與伊弟王三樂等有无傳教及王泳
太是否卽係王三顧之處王際昌等諒無不知己
行司傳拏各徒犯提同王三樂等質訊辦理謹

奏

嘉慶二十年十一月初三日

奏爲遵

旨查辦并將先已訊出端倪奏明密拏事竊臣於十月三

十日承准軍機大臣字寄十月二十九日奉

上諭王秉衡卽王景曾其族分住直隸灤州及盧龍縣等處以大乘教清茶門分往外省傳徒斂錢茲王秉衡自直隸至楚省復來江南傳徒柳有賢轉傳金棕有傳至逆犯方榮升釀成巨案該犯實爲禍首現已拏獲解赴湖北訊明嚴辦昨據那彥成奏於盧龍縣緝獲王殿魁等犯並查提王姓充徒各犯分別審辦石佛口王姓一族世傳邪教歷年久遠蔓延數省現已屢次犯案著那彥成卽派委幹員前往灤州及盧龍等處將王姓族中傳教之人全數收捕勿令免脫一名解至省城嚴行審

訊訊明後將爲首傳徒者問擬絞決其爲從者分別發
遣流徙並向各該犯家中嚴密搜查將所藏九蓮如意
皇極寶卷真經元亨利貞鑰匙經及一切邪悖經卷全
行起出封送軍機處呈覽務令爭絕根株勿稍留遺孽
除惡務盡切勿姑息欽此伏查

臣

前在河南辦理教匪

所有拏獲教犯逐件審訊彼時卽係盛泰等隨同
辦理

臣

卽屢諭盛泰等令將各處習教之人何處
最多傳至何人逐人訊問逐件留心以備查辦務
絕根株庶免別滋事端而盛泰亦最肯用心存記
又在保定府任內審辦邪教最多是以直省傳習

邪教源流惟

臣

與盛泰少知梗概今欽奉

諭旨謹據

臣

等所知畧爲陳敘查當日據獲到教匪各供

滑縣鬧事之人俱係震卦教凡有在教者均稱爲
東方震宮王老爺門下其王老爺係首先傳教之
山東菏澤縣人王中已於乾隆三十七年犯案正
法林清徒黨多係坎卦教凡有在教者均稱爲北
方元上坎宮孔老爺門下其孔老爺係首先傳教
之山東寧陽縣人孔萬林亦已於王中案內正法
至大乘教金丹八卦教義和門如意門等教凡有
在教者均稱爲南方離宮頭殿真人邵老爺門下

其部老爺係首先傳教之河南商邱縣人部生文
已於乾隆三十六年犯案正法又訊有清茶門教
係滑縣人王正紀所傳當卽拏獲辦理卽係灤州
石佛口王姓分支當時卽已飭令密記存查臣於
到任後查辦各項教匪查得嘉慶十六年經溫承
惠審辦過鉅鹿縣民孫維儉等係以吳二瓦礮所
傳之好話教卽離卦教改名大乘教賄串孔傳標
偕修尼山祠宇爲名惑衆斂錢一案將大會首孫
維儉等五名分別擬以絞決監候二會首宋連捷
等九十餘名連吳二瓦礮一併擬遣其散會首盧

珍明等一千六百三十餘名

奏准取具悔結存記檔冊再犯加等治罪十七年又經
溫承惠拏辦過前案內散會首復圖興教私雕偽
寶印蓋護道榜文之劉幘名等三十餘名口分別
斬決發遣是年又拏獲灤州李家套民董懷信等
三十餘名傳習金丹八卦教審出曾經入教男婦
五千一百餘名將董懷信等分別斬決發遣其餘
男婦取具悔結存案十八年冬間大乘教案內擬
絞監禁之大會首李經在監勾結同教田克岐散
旗謀逆經署督臣章煦及臣在軍營訪聞分起交

員拏獲李經等卽奉

旨當下辦理旋又究獲八卦教內首要逆犯張九成楊遇
山宿元謨劉坤并河南離卦教首卽生文之孫卽
坦炤劉功等分案

奏明擬以凌遲斬遣惟查愚民私相傳習邪教一時原
難稽查是在地方官時刻留心於曾犯數案之犯
曾經習教之家不動聲色嚴密稽查務使不驚不
擾隨案究其源流庶可斷其傳習

臣仰荷

皇上畀以

畿輔重任秉承

指示夙夜實力整飭不敢稍存踈懈斷不肯令邪慝復萌
釀成巨案除陸續拏獲滑縣潛逃從逆各犯並林
清案內應行緣坐餘黨不敘外其離卦一教仍未
改悔之案如所獲安平縣傳習離卦教之楊俊等
究出首先傳教吳二瓦礪之子仍稱少當家之吳
洛雲并其徒大頭目路運等一案交河縣傳習一
炷香離卦教之齊聞章等搜出違背十王經卷一
案滄州吳久治路老等傳習佛門教一案青縣季
八葉幅明等傳習義和門教一案又青縣邊二從
習白陽教預知逆情一案景州葛錫華等從習離

卦教預知逆情一案邢州邢士魁等傳習如意教
搜獲妄造表名掛號總冊一案故城縣葛立業傳
習義和門拳棒預知逆情一案均經訊明教名雖
別俱係離卦教之子孫徒黨逐起

奏明分別凌遲斬遣在案現又訪獲青縣尤明等傳習
義和門離卦教一案東鹿縣馬楊氏傳習紅陽教
搜獲飄高老祖經一案亦經

奏明從嚴究辦至石佛口王姓傳教一案臣先卽存記
前在湯山差次面奉

諭旨飭拏赴楚傳教之王姓當經臣派員在盧龍縣安家

樓莊訪獲自江南回籍之王殿魁并其子王朝萬
二犯提省嚴訊據王殿魁供認於乾隆五十七年
卽在淮安溧水泗州江寧等處傳徒伊卽在山陽
開糧食店五六年回家一遍並據供出伊族人在
湖北傳教共有三人一名王書魯一名王泳太一
名王興建王書魯先在江南儀徵縣傳教卽在彼
住家王泳太王興建俱在盧龍縣安家樓莊住又
有在山西傳教犯案王如青之次子小名來子伊
族石佛口有兩支俱在旗分東西兩院王如青是
東院人其餘在安家樓莊及闕家莊係屬一支俱

係民人等語續又據委員稟在安家樓莊拏獲王
三樂王三畏二名訊據供稱伊等均未習教惟伊
次兄王三聘又名王紹英曾在山西傳教犯案業
已奏辦伊三兄王三顧從前亦往山西回家後旋
患瘋迷於本年四月內外出不知去向臣以王三
樂王三畏所供全係狡卸且該族之人類多傳教
犯案因查從前辦過王烈案內有王際昌王漢倬
王秉鈞三犯分發邢臺等縣充徒行司提省質訊
至王殿魁供出在湖北傳教之王書魯一犯現准
湖廣咨會內開樊萬興案內之王姓卽王大鼻子

已准江蘇省拏獲核與王殿魁所供形貌相符其
王泳太王興建二犯亦在湖北傳教當卽飛檄各
委員飭拏一面奏蒙

聖鑒在案今據百齡等奏將緝獲之王秉衡卽王景曾解
楚嚴辦查與王殿魁供出在湖北傳教之王書魯
名不相符復提王殿魁研訊據供王書魯原係景
字排行又名王景曾卽王大鼻子屬實等語臣業
經咨會湖廣督臣審究至王姓世習邪教分往各
省傳徒蔓延數省屢次犯案怙惡不悛且灤州盧
龍等處附近京畿並係

盛京往來要路斷難容習教匪犯潛踪誘煽誠如

聖諭必當將該族習教之人全數收捕分別懲辦嚴密搜查邪悖各經卷務令淨絕根株不使稍留餘孽

臣

前經派委保定府同知汪洞前赴該州密拏已據獲到教犯王三樂王三畏王鳳吉王來子等四名已飭提省審辦并仍令該員在於該州石佛口盧龍縣安家樓及闕家莊等處實力查拏現又恭錄聖諭密劄前委查勘永平府屬一帶道路之清河道韓文綺令其遵

旨就近督拏該族習教之人並搜查各項邪悖經卷解省

嚴行訊辦斷不敢稍存姑息以期仰副

聖主除惡務盡之至意謹

奏

嘉慶二十年十一月初五日軍機大臣字寄奉

上諭前據百齡等奏緝獲傳教匪徒盧龍人王秉衡卽係灤州石佛口王姓該犯族中向多習教之人散在山西江南湖北等處傳徒難保其家中無藏匿邪悖經卷煽惑之事當經降旨令那彥成派員前往緝捕茲據那彥成覆奏現派清河道韓文綺在灤州石佛口盧龍縣安家樓莊闕家莊等處督率查拏灤州盧龍兩處王姓之

人自必不少此內習教傳徒者必應查辦其餘凡屬王姓之人亦不得妄拏滋擾著那彥成卽飭知韓文綺行抵該處先行察訪明確其家果係素來習教傳徒者鄰里保長斷不能掩其耳目且必有藏匿邪悖經卷一經訪實卽按名收捕並查起經卷勿留餘孽其祝現等要犯或亦潛匿該處並著一併根究毋稍疎漏總之除惡務盡亦不可濫及無辜也

嘉慶二十年十二月十四日

奏爲查明石佛口王姓實係邪教總匯惡根已將傳教之人拏獲審訊大概情形事竊照灤州石佛口王

姓習教傳徒一案先經遵

旨派員查辦湖北民人樊萬興等所供傳教之灤州王姓
當卽拏獲王殿魁一犯究出曾在江南傳教并供
王書魯等三犯各在湖北等處傳教奏請咨緝旋
奉

諭旨百齡等緝獲盧龍縣人王秉衡卽係灤州石佛口王
姓該犯族中向多習教之人散在山西江南湖北等處
傳徒飭令臣派員前往將該族習教傳徒之人全數搜
捕勿令兔脫一名并嚴密搜查九遠如意皇極寶卷其
經元亨利貞鑰匙經及一切邪悖經卷欽此復經臣奏

明派委清河道韓文綺在灤州石佛口盧龍縣安家樓及闡家莊等處督率先經派往各員會同各該地方官等嚴密搜查復奉

諭旨灤州盧龍兩處王姓之人自必不少此內習教傳徒者必應查辦其餘凡屬王姓之人亦不得妄拏滋擾著那彥成卽飭知韓文綺行抵該處先行密訪明確其餘果係素來習教傳徒者鄰里保長斷不能掩其耳目且必有藏匿邪悖經卷一經訪實卽按名收捕并查起經卷勿留餘孽總之除惡務盡亦不可濫及無辜也欽此

臣
隨欽遵

諭旨檄行各委員嚴密搜查并飭知石佛口王姓實爲邪
教惡根此次旣經查得務必除盡根株不使稍留
遺孽因令繪具王姓支派宗圖去後嗣據各委員
及該地方官等分路訪查先後稟覆將應行解訊
之人并繪具該族宗圖支派人數清單陸續解送
來省臣督同兩司首府及因公在省之霸昌道齡
佐等按圖逐細查審查得該族王姓原住灤州石
佛口後又分遷盧龍縣安家樓及闕家莊現據委
員查得石佛口王姓大小男丁共四十餘人未習
教者二十六名訊係外出應行咨緝者王殿弼王

弼二名現在訪獲應行解訊者王殿卿王殿元王
交王訓四名其餘均係小口安家樓大小男丁共
二十餘人未習教者八名訊係外出應行咨緝者
王泳太師王三顧王九思二名現已訪獲應行解
訊者除王殿魁王興建先已解省外尚有王亨仲
王時玉王三樂王三畏王勤業王福兒王奎容王
和王朝萬九名其餘均係小口闍家莊大小男丁
共十餘人除小口外查明並無習教者共十二名
並訪明該姓一族本係三支長王偉次王儒三王
道森檢查乾隆三十六年王忠順案卷敘有王敏

迪於雍正年間傳教犯事王敏迪係王道森元孫以前無案可稽此後傳教各犯俱係王道森一支後裔丁亦繁多王道森曾孫王鹽始由石佛口遷居安家樓王鹽之第四子王德修因屢被族人連累又由安家樓遷居闕家莊其現在審明實係習教傳徒之犯一爲王殿魁伊父王亨功於乾隆三十六年在安徽傳教犯案正法伊祖發遣伊於乾隆五十七年起在江南淮安泗州等處傳教先後傳徒徐二凝秦過海王添弼吳長庚等四人伊卽在山陽縣屬蔡橋地方開糧食店住家一爲王興

建於嘉慶三年起在湖北武昌漢口等處傳教伊
赴湖北四次先後傳徒王自玉侯大化方仲才張
壽太李塌鼻子五人又傳王自玉之妻王王氏并
其姊王三姑又漢陽縣民婦王三婆吳三婆鄒姑
等五人王自玉又轉傳徐治輞陳宗恒二人侯大
化又轉傳方文炳一人一爲王亨仲伊兄王忠順
卽王亨功於乾隆三十六年在湖北河南等處傳
教犯案正法伊父王秀充發伊於乾隆五十三年
起赴湖北京山縣先後傳徒余爲淇余爲洗劉東
山鄭勝奇陳紹玉五人一爲王時玉伊父王充恭

曾於嘉慶十三年間在河南新野縣傳教有張蒲
蘭喬成章喬第五鄭宗道張舉曾拜伊父爲師伊
父於十五年間病故伊卽於是年十月仍往新野
收張蒲蘭等五人爲徒以上四犯俱經拏獲審認
其王泳太卽王三顧一犯據王殿魁王興建仝供
係與王書魯卽王秉衡俱在湖北武漢等處傳教
之犯并據王興建供明王泳太在湖北漢陽縣傳
徒李朝柱陳大綱二人本年四月間伊借給盤費
王泳太仍往找尋李朝柱等語此外惟王景益家
內傭工之閻芝供出王景益於嘉慶十二年曾往

河南傳孟縣人常敬先涉縣人劉瑞劉廷樹爲徒
其王殿卿等十餘人屢經研訊均不認習教傳徒
至該犯等所傳教名據供爲清茶門教世代流傳
相沿已久教人三皈五戒三皈係一皈佛二皈法
三皈師五戒係一戒不殺生二戒不偷盜三戒不
邪淫四戒不葷酒五戒不誑語每逢朔望早晚燒
香供獻兩鍾茶凡傳教者皆稱伊等爲爺向其拜
禮送給銀錢多少不等並無另有經卷咒語訊以
王秉衡所供九蓮如意皇極寶卷真經元亨利貞
鑰匙經不惟王殿魁等堅供伊等家內並無此項

經卷并據各委員及該地方官等先後稟覆在於該族曾經習教犯案之家逐細密搜委無藏有前項經卷此

臣遵

旨查審王姓習教傳徒人數並委員搜查之原委也臣因查該犯等所供三皈五戒止勸人喫齋修好現經嚴查又無妄誕符咒及別項經卷何致累代流傳蔓延各省俱皆聽其煽惑送給銀錢且屢年犯案正法發遣者不一而足何以該族人等溺迷不悟始終仍蹈覆轍其中必另有詭秘別情該犯等匿不供吐因查從前王烈案內經部將該族一

文王一犯先經提傳至省據供伊曾隨從犯案在
部監斃之王逢太到過邯鄲磁州等處王逢太傳
劉煥郭太舉等當卽派委員弁馳往邯鄲等處會
同該地方官等將劉煥郭太舉拏獲並將劉煥等
輾轉供出之王克勤王曰平王曰安田元隴杜立
功申明蘭朝元姬有名徐科等一併拏獲在王克
勤家搜出三教應劫總觀通書一本及抄寫經卷
一本並起獲劉煥等往來書信三紙當將經卷詳
細檢閱以燃燈佛釋迦佛未來佛爲三劫有青山
石佛口字樣臚列三皈五戒其悖逆不法語句均

堪髮指當提王克勤嚴訊供認伊自幼聽從伊故
母楊氏習清茶門教嘉慶五六年間有河南滑縣
裴村居住之張良臣故祖張成甫寫信給伊以老
師傅王度現住石佛口伊往拜王度爲師王度死
後又拜其子王逢太爲師傅伊三皈五戒向其禮
拜稱之爲爺屢次幫給銀錢名爲根基錢所起通
書經卷伊母告知係由石佛口王姓轉給張成甫
家張成甫轉傳伊家祖父因訊之王殿魁等亦均
認係王家所傳之書不諱其書內有天盤三副過
去係燃燈佛掌教每年六箇月每日六箇時現在

係釋迦佛掌教每年十二箇月每日十二箇時將來係未來佛掌教未來佛卽彌勒佛每年十八箇月每日十八箇時未來佛降在石佛口王姓家內經卷內有石家第三郎之語不知應在何人如有入教每年正月十二月送給根基錢一次若逢未來佛出世卽得好處是以人皆信服會中人都知道質之劉煥郭太舉王曰平王曰安田元隴杜立功申明蘭朝元姬有名徐科供俱相同並據供稱伊等會中從前犯案之人因經有悖逆語句是以止認三皈五戒復將起獲書信三紙向王克勤

等犯詰訊據稱信內所寫青山主人卽係犯案監斃之王逢太所稱朝上二字卽係上朝所稱爺者卽係主上是以入教之人俱係師徒相稱獨王姓爲爺其分最尊俱向禮拜磕頭各邪教之分去彼甚遠所有書信銀錢均由張良臣轉送此時名爲根基錢將來卽爲元勳錢隨提王殿魁王興建質審始據供認伊家祖父相傳原因書內有未來佛降在伊家之語藉此騙人入教得受根基銀錢與王克勤等所供無異并稱伊等先因祖父屢次犯案所有經卷人已燒燬無存實無另有藏匿及謀

逆不法情事臣伏查該族傳教始於王森溯查明
史趙彥列傳內載有王森得妖狐異香倡白蓮教
自稱聞香教主居灤州石佛莊萬厯年間爲有司
所攝斃於獄其子好賢及徐鴻儒等踵其教徒黨
益衆後亦伏誅等語自王森至今已有一輩王森
後又改名王道森厯年傳教犯案多係王道森後
裔總因所藏三教應劫書內有未來佛降生青山
石佛口字樣是以王姓傳教之人俱稱爲青山主
人入教者皆稱之爲爺寫信者竟尊爲朝上送給
銀錢者並推爲根基元勳磕頭禮拜居然有主臣

之分實屬大逆不道

臣

前曾訊辦滑縣人王正紀

習清茶教之案卽係石佛口王姓所傳當時雖已

密記存查究未得其根源卽各省查辦邪教名目

甚多亦僅知其輾轉流傳未能溯其總滙今經起

獲通書經卷逐細核審傳教之王殿魁王興建與

習教之王克勤郭大舉等供俱脗合是該族世傳

此教借未來佛掌盤之邪說煽惑人心釀起異謀

毒流數省害延累代竟爲各項邪說之宗卽如林

清謀逆滋事竟有此時應劫將來另有起事之人

之供其意諒卽指此方榮升改造厯法爲十八箇

月之說亦係由三教應劫天盤之邪說肆謀不軌其書實傳自王姓實爲禍首惡根前奉

諭旨飭令

臣

訊明此案將爲首傳徒者問擬絞決爲從者

分別發遣流徙自應欽遵辦理惟查該族人歷經犯案總未悛改實由三教邪說易滋煽誘往往一再流傳卽成巨案名爲清茶似無謀逆之迹暗圖未來實爲謀逆之由且各教係師徒相稱該教則稱爺拜禮不但遂其騙誘銀錢之私並顯肆其正名定分之惡臣於定案時另擬盡法嚴懲方足以絕根株而斷萌孽至王殿魁供在湖北傳教之王

涿太及該犯等在湖北江南河南所傳之徐二凝等并滑縣民人張成甫之孫張良臣是否均已物故臣開具住址年貌繕具清單并恐各省被誘入教之犯藏有三教應劫逆書若不搜查淨盡仍恐貽害無窮請

旨勅下江南湖北河南各督撫一體查照清單嚴緝究辦並密搜三教應劫逆書務令毀除淨盡如各省所獲之犯仍有直省未經審出之供仍一面飛咨查辦臣仍日夜熬審再有別情亦必盡情辦理斷不稍有遺留以期永絕根株所有起獲違悖逆書經

卷二本及書信三紙分別粘簽並該族宗圖清單
一併封呈

御覽謹

奏

謹將查明王姓人數繕具清單敬呈

御覽

石佛口王姓現存人數

王加卓年六十二歲

王加語年四十七歲

王加相年四十一歲

王 孝年三十五歲

王 佩年四十二歲

王 寶年二十七歲

王 作年二十二歲

王 居兒年十七歲

王 石年十九歲

王 乃廝年十三歲

以上係王偉後裔

王廣臣年四十四歲

王加惠年四十二歲

王加均年四十歲

王加美年九歲

王九兒年四歲

王左年二十八歲

王所兒年二歲

王增立年十一歲

王增雙年六歲

以上係王儒後裔

王殿卿年二十七歲解省

王殿臣年三十歲

王殿弼年三十六歲外出 另請咨緝

王殿士年二十八歲

王有兒年十四歲

王殿元年三十九歲解省

王鎮吉年五十二歲

王桂兒年九歲

王殿英年三十七歲

王殿才年三十歲

王殿緒年二十一歲

王殿太年十五歲解省

王履太年八歲

王 卿年二十五歲外出 另請咨緝

王 訓年十八歲

王太平年五歲

王雙弼年二歲

王定兒年十一歲

王如意年十八歲

王狗兒年五歲

王得意年十七歲

王黑厮年十四歲

王明兒年四歲

王存廝年十四歲

王四兒年三歲

以上係王道森後裔

安家樓王姓現存人數

王允武年三十九歲

王興建年六十五歲解省

王勤業年五十一歲解省

王泳太即王三顧年五十歲外出 另請咨緝

王三樂年四十一歲解省

王三畏年三十五歲解省

王亨仲年六十歲解省

王時措年五十三歲

王時玉年四十一歲解省

王時田年三十四歲文生

王九思年四十一歲外出 另請咨緝

王壽兒年十歲

王時楨年二十三歲

王時柱年十九歲

王珠兒年二十五歲

王福兒年十八歲解省

王殷魁年五十二歲解省

王奎榮年三十五歲解省

王和年二十九歲解省

王文剛年十七歲

王豐露年十九歲

王宗禹年九歲

王二哥年五歲

王隴春年十三歲

王朝萬年三十四歲解省

王盛兒年十六歲解省

王添富年五歲

王添貴年三歲

闕家莊王姓現存人數

王居廣年六十八歲

王允謙年五十歲

王景祥年三十五歲

王佐弼年三十歲

王松齡年二十八歲

王蔭槐年二十五歲

王五常年二十一歲

王啟昆年四十六歲

王福壽年二十八歲

王發兒年二十一歲

王貴卿年二十七歲

王甲寅卽王瞻子年二十二歲

王庚兒年十四歲

王隴兒年九歲

謹將王姓外出應緝之犯及王殿魁等在全省所傳之犯繕具清單敬呈

御覽

王姓族中外出之犯

王泳太卽王三顧盧龍縣安家樓人年五十歲
高身材長臉有麻黃鬚本年四月赴湖北漢陽
縣城外鄧家領李朝桂家傳教

王九思盧龍縣安家樓人年四十一歲出外十
年不知下落

王殿弼灤州石佛口人年二十六歲出外三年
有餘不知下落

王弼灤州石佛口人年二十五歲於十九年

因伊父王景益在江南犯案逃逸

王殿魁在江南所傳之徒并王殿魁在江南親屬

徐二凝係山陽縣安吉村人

秦過海係溧水縣桑園鋪人

吳長庚係上元縣城內人住豐富巷

王添弼係安徽泗州斗戶王家岡人

王滿定係盧龍縣安家樓人王殿魁之次子

王得子係王殿魁三子俱現住淮安府山陽縣

河下二十四五堡開永昌號糧食舖

王殿魁供出王書魯在湖北所傳之徒

李良從係王書魯從弟現在湖北武昌府草北門外打鐵

王興建之父王廷俊在湖北所傳之徒

李光達係漢陽縣漢口鎮黃家塘人

吳大深係漢陽縣漢口鎮體仁巷人

王興建在湖北所傳之徒

王自玉係湖北江夏縣草湖門外磚瓦巷人種

菜園年三十來歲中身材圓臉微麻無鬚

王王氏係王自玉之妻年三十來歲

王三姑係王自玉之姊年四十來歲

侯大化係湖北江夏縣人在撫院衙門前居住
年四十六七歲小身材白臉微麻微鬚

方仲才係漢陽縣漢口鎮仁義巡檢司前開設
香料舖是否已故

張壽太係江西人在漢陽縣城外雙街巷開雍
頭舖年五十來歲中身材圓臉黃鬚

李塌鼻子係江西人不知名字在雙街巷居住
挑薙頭担年五十來歲中身材塌鼻有鬚

王三婆係漢陽縣鄧家嶺人年六十來歲

吳三婆係漢陽縣漢口鎮後體仁巷吳大深之

妻年五十來歲

鄒 姑係在漢陽縣漢口鎮仁義司巡檢衙門
對過尼姑菴內帶髮修行

王自主轉傳之徒

徐治喇係武昌府草湖門磚窰巷人

陳家恒係漢陽縣蓮花堤人

侯大化轉傳之徒

方文炳係漢陽縣漢口鎮存仁巷人

王泳太在湖北所傳之徒

李朝桂係漢陽縣鄧家嶺人種菜園

陳大綱卽陳堯係漢陽縣城外老街做裁縫

王亨仲在湖北所傳之徒

余爲淇現年七十餘歲中身材長臉有鬚住湖北山縣山裏于冲莊

余爲洗現年七十餘歲中身材長臉微麻有鬚住湖北京山縣山裏于冲莊

劉東山現年八十餘歲中身材圓臉微鬚住湖北京山縣孫家橋

鄭生玉現年八十餘歲中身材圓臉微鬚住湖北隨州二道河大街

陳少奇現年九十餘歲中身材長臉有鬚住湖北隨州二道河山裏

王時玉在河南所傳之徒

張蒲蘭現年七十餘歲大身材長臉白髮白鬚住河南新野縣張家集伊子係啞吧年四十餘歲中身材長黃臉微鬚

喬成章據王時玉供稱病故其子不知何名約年四十餘歲住河南新野縣溫家橋

喬第五係喬成章之弟現年五十餘歲中身材圓黃臉有鬚住河南新野縣溫家橋

鄭道宗現年六十餘歲中身材長臉有鬚住新野縣連界鄧州鄭家集

張學會現年五十餘歲中身材長臉有鬚住殷家坡離張蒲蘭家五六十里路不知何縣所屬王景益卽王汝諧在河南所傳之徒

常敬先係河南孟縣人年五十餘歲中身材長臉有麻大鬚子

劉瑞係涉縣東莊人向賣花椒年五十餘歲小身材圓臉微鬚

劉廷樹係涉縣東莊人當陰陽生年六十餘歲

微鬚

王度在河南所傳之徒

張良臣係滑縣裴村人曾否病故

嘉慶二十年十二月十四日

奏石佛口等處王姓傳教一案

臣

愚昧之見請將該族

爲首傳教者俱照大逆定擬解交該處正法梟示
親屬緣坐其習教之犯及外省被誘入教者俱發
回城爲奴現在查明該族惟闕家莊一處祇有十
餘家訊因王德修懼被教案牽累是以遷居其子
孫向不習教外其石佛口安家樓二處審明實係

習教者仍依習教之例辦理其餘雖訊未習教但該族人等詭秘百出焉知非其有意留根抵死不吐是現供全不足信且闕家莊亦係王道森後裔均難保其日後不萌故智況各省習教之人既宗王姓又有彌勒佛生於其家之書使天下習教之人邪心總不肯死至屢次各處所拏之黃陽青陽紅陽等教乃亦本其悖逆若稍存姑息仍留餘孽數年後又別滋煽習終是未完自未便以該族此時詭稱不習邪教且有田廬房產仍聽其容留小有不忍致滋萌孽

臣

再四躊躇請於定案時將石

佛口安家樓二處之訊未習教者及闕家莊之十餘家俱遷徙雲貴兩廣四省分別安插

臣受

恩深重萬不敢稍存張大從嚴之見惟既查明該族積惡貫盈實爲各教總根不得不爲剪惡除根之計以

期仰副

聖主除莠安良之至意謹

奏

嘉慶二十年十二月十六日軍機大臣字寄奉

上諭那彥成奏明石佛口王姓實係邪教總匯惡根已將傳教之人拏獲審訊大概情形一招所辦甚好已另有

旨加恩矣。灤州石佛口王姓其先世王森自前明以來倡立白蓮教自稱聞香教主流傳至今二百餘年已閱十輩屢經破案其子孫仍怙惡不悛改稱教名爲清茶門入教者皆稱之爲爺書信內並隱約朝上爲上朝送給銀錢名爲根基錢將來卽爲元勲錢磕頭禮拜儼若主臣似此潛蓄異謀實爲各項邪教首惡所有起出三教應劫總觀通書前年林清滋事時卽持此書惑衆揚言爲應劫起事又所稱三教分掌天盤彌勒掌教時每十八個月爲一年方榮升僞造萬年書亦由此邪說而起至書內逆詞不一而足如清朝以盡四正文佛落在

王門胡人盡何人登基日月復來屬大明牛八元來是
土星等語閱之真堪髮指該逆如此狂悖爲臣子者豈
可不憤切同仇盡法嚴辦以期除盡根株毋留遺孽前
降諭旨原以該犯等僅止習教斂錢照例將爲首者問
擬絞決爲從者分別遣流今查種種悖逆情形罪同林
方二逆必應照大逆辦理著該督卽將現獲各犯嚴行
審訊爲首者按照大逆律問擬凌遲派錢錄解交刑部
覆審正法梟示該逆親屬照例緣坐其餘習教之犯及
外省被誘入教者俱照該督所奏發給回城爲奴至該
處王姓族人雖未經習教亦如所請遷徙雲貴兩廣地

方分別安插該督卽晝夜盡心研究祝劉等逆切實下落審明後分別定擬奏明辦理其江南湖北河南等省傳教各犯已有旨飭令各該督撫等迅速查拏卽於該省訊明辦理矣

嘉慶二十年十二月十六日奉

上諭那彥成查拏石佛口世習邪教王姓一案辦理甚屬認真著吏部查明那彥成被議處分共有幾案由軍機處具奏候朕酌量恩施發去御書福字一個賞那彥成之母並發去鹿肉二盤麋肉二盤棍鹿肉二盤野雞五隻賞那彥成之母及那彥成祇領度歲以示恩賞餘著交

綺緝捕勒能著加恩賞戴花翎

嘉慶二十年十二月二十一日

奏爲遵

旨嚴訊定擬並將傳教爲首之犯派交藩司解部覆審事

竊照灤州等處匪犯王殿魁等世代踵傳邪教惑

衆並追獲妖書送信一案先經臣委員拏獲王殿

魁一犯究出曾在江南傳教並供出有伊堂叔王

書魯卽王秉衡又名王景曾綽號王大鼻子同王

泳太卽王三顧王興建等三犯各在湖北等處傳

教當經臣

奏請咨緝派委清河道韓文綺馳赴灤州一帶督率原委各員及各該地方官嚴密查拏陸續獲到王興建王亨仲王時玉王三樂王三畏王勤業王幅兒王奎榮王和王朝萬王奎子王殿卿王殿元王交泰王訓等十五名解省因訊據各犯所供石佛口王姓係世習清茶門教傳三皈五戒祇係勸人喫齋行好何致蔓延數省聽其煽惑甚至屢加懲辦該族人等溺迷不悟始終仍蹈覆轍其中顯有詭秘別情匿不吐實隨將從前王烈等案內經部審擬充徒之王秉衡王際昌郎文玉王漢卓等四名

密提到省又獲到曾從業經犯案發遣之王景益
王烈習教人犯閻芝一名逐加隔別察訊據郎文
玉供稱伊曾隨從犯案在部監斃之王逢太入教
聞得灤州石佛口王家將來有彌勒佛出世遵其
教者必有好處是以隨從習教王逢太與父王度
曾在本省邯鄲縣磁州傳徒劉煥等多名伊亦到
過邯鄲磁州情願作眼隨同官役緝拏臣卽檄司
派委樂城縣知縣徐志祖靈壽縣知縣高蔚溶帶
同郎文玉馳往會同各該地方官查緝並飭令搜
查各犯有無違悖經書字跡務獲解究當據該員

在磁州獲到劉煥王日平王日安申明蘭朝元姬
有名在邯鄲縣獲到郭太舉王克勤田元隴又在
南和平鄉威縣獲犯杜立功何永言徐科等十二
名並在王克勤家搜獲抄寫三教應劫總觀通書
一本三教經一本書信三紙一併解送來省臣檢
閱三教應劫書信等件其中悖逆不法語句殊堪
髮指細加推鞠始據一千人犯供明灤州石佛口
王家原係藉此以爲四出惑衆張本隨將查訊大
概情形並訪查該族宗圖人數清單及搜獲經本
等件一併具

奏欽奉

諭旨著

臣卽將現獲各犯嚴行審訊欽此 臣遵復率同司

道首府及各委員等提集人犯逐細研鞫緣王殿魁王興建王亨仲王時玉等均係祖居灤州石佛口偶立白蓮教首王森卽王道森後裔改其教名爲清茶門有仍住石佛口者有搬移至安家樓分居青原捏有三教應劫妖書一本妄以與圖係燃燈釋迦未來諸佛掌教未來佛卽彌勒佛將來係降於石佛口王姓家內又捏有三皈五戒經本以此四出惑衆誘人歸教給與伊家根基錢待彌勒

出世共享榮華間有所給其家之錢名爲元勲錢者均不過欲其家將來能與人富貴之意歸其教者卽稱之爲爺向其禮拜端坐不辭是以其教惑人易而且廣久而難滅遂至世代傳流蔓延數省屢經懲辦愚頑不悛如現獲之王殿魁其父王亨功卽王忠順與祖王秀向在江南淮安泗州等處傳教於乾隆三十六年犯案正法發遣乾隆五十七年王殿魁仍在該處踵行其教於山陽縣蔡橋地方開設糧店收徒徐二庭秦週海王添弼吳長庚等四人王興建係踵其故父王廷俊在湖北武

昌一帶傳教收徒王自玉侯大化方仲才張壽太
李塌鼻子王自玉妻王氏王自玉之姊王三姑並
漢陽縣民婦王三婆吳三婆鄒姑等十名口王興
建常往歛錢其父王廷俊在漢陽縣所傳之徒係
李光達吳大深二人王自玉侯大化又轉傳徐治
惘陳家恒方文炳三人王亨仲卽係犯案充發王
秀之子與已正法之王亨功係同胞弟兄王亨仲
於乾隆五十三年自赴湖北京山縣收其父之徒
余爲洪余爲洗劉東山鄭勝玉陳紹奇等五人爲
徒王時玉係嘉慶十五年於伊父王允恭故後自

赴河南新野地方收父徒張蒲蘭喬成章喬第五
陳宗道張學會等五人爲徒此外尙有現獲之王
交太其故父王度故兄王逢太曾收河南滑縣張
良臣之祖張城南同現獲之磁州人劉煥王日平
王日安申明蒲朝元邯鄲縣人郭太舉王克勤田
元隴南和縣人杜立功平鄉縣人徐科威縣人何
永言等十二人爲徒並有磁州人姬有名之已故
祖父母亦曾歸教姬有名並不習教現獲三教應
劫妖書係張城南得自王度家內迨張城南身故
始歸王克勤家所有起獲書信三紙亦係張城南

之孫張良臣在日所寄同教人申明王克勤之信
又有現獲王三樂王三畏二犯之胞兄王泳太卽
王三顧現在湖北漢陽傳教收徒李朝桂陳大綱
又有已在江南犯案擬遣病故之王景益同前經
直省拏獲解部擬遣病故之王烈曾在石佛口本
村收徒卽文玉閻芝並河南孟涉兩縣人常敬先
劉瑞劉廷樹等五人又有江南現獲解赴湖北之
王書魯卽王秉衡綽號王大鼻子係向在湖北傳
教王殿魁知其在彼有徒李良從惟有由石佛口
遷居廬龍縣闕家莊之王德修一支並不習教現

訊王殿魁等供悉前情不諱

臣

因查三教應劫妖

書本係王姓家捏出語句狂悖以爲藉此要結人心惑衆斂錢之具乃現在傳教各犯本家何以轉無此書顯係藏匿不肯據實供出嚴加根究據該犯等供稱石佛口傳教各家屢經犯案之後經書等項俱已銷毀各家並不敢存留至在外傳教之人有無傳有此項經卷在外均係各自傳教無從知悉

臣

等又查該族世傳此教借未來佛掌教之

邪說煽惑人心釀蓄異謀毒流數省害延累代實爲各項邪教之宗其與在逃祝現等諸逆難保無

勾結隱狗等弊復加追究據稱伊等因知有祖傳
有三教應劫等書以將來彌勒佛掌教降生石佛
口王家藉此妄自尊大冀圖易於惑衆騙錢實無
另有謀爲不軌情事委與逆匪祝現等向不認識
並無勾結容隱等弊嚴詰至再均各矢口不移案
無遁飾查欽承

上諭現獲各犯爲首者按照大逆律問擬凌遲梟示親屬
照例緣坐其餘習教之犯及被誘入教者俱發給回城
爲奴至該處王姓族人雖未經習教亦遷徙雲貴兩廣
地方分別安插欽此今查王殿魁王興建王亨仲王時

王均係教犯子孫於懲辦之後怙惡不悛膽敢妄
造妖書分往各省傳教惑衆核其情節同現獲妖
書甚爲狂悖不法與大逆無異實屬罪大惡極法
不容誅王殿魁王興建王亨仲王時玉等四犯均
請照大逆律凌遲處死解至石佛口正法分別傳
首江南湖北河南各犯事地方梟示以昭炯戒現
獲王克勤郭太舉申明田元隴王日平王日安劉
煥杜立功藺朝元徐科何永言閻芝等十二人俱
係爲王姓邪說煽惑被誘入教均請發給回城給
大小伯克爲奴郎文玉先曾習教擬徒現經情愿

作眼帶同官役指獲同教多人尙知畏法與悔過
自首者無異自當予以自新免其仍發原配充徒
遞籍保釋如敢復犯加等治罪以昭懲勸王姓族
人內王延俊在湖北傳教王允恭在河南傳教王
喜在河南傳教王三省在湖北傳教王彥并子王
逢太在河南并本省邯鄲一帶傳教以上六犯均
已在籍病故應請創墳戮屍卽在本地方梟示王
紹英卽王三聘在山西傳教王景益在江南傳教
王烈在江南傳教該三犯業經犯案治罪在外病
故應毋庸議現獲王秉鈞係王烈之子王交太係

王度之子王漢卓係王喜之子王訓係王景益之子王奎榮王和係王亨仲之子王朝萬王奎子係王殿魁之子均請照例緣坐仍改發回城給回子爲奴王際昌王殿卿王鳳吉均係訊明未經習教之石佛口王姓族人應請遷徙雲貴兩廣地方分別安插獲解來省之劉法姬有名二名訊無入教情事請免置議無干省釋至此外應行緣坐及應遷徙各犯家口請

旨卽飭藩司錢臻前往會同清河道韓文綺督同灤州盧龍二州縣逐細查明分項造冊解省核議奏明辦

理該族房地財產一併抄追入官冊報王殿魁在江南流寓家屬及所開糧店請

旨飭交兩江督臣照例查辦其在外省傳教各犯與被誘入教之犯及在逃各應緣坐遷徙家屬分別移咨飭屬通緝務獲究辦所有案犯王殿魁王興建王亨仲王時玉四名係傳教首犯罪擬寸磔同存有逆書在家之王克勤暨備質要犯郭太舉臣遵

旨派藩司錢臻帶同委員等分起解交刑部核覆審辦餘犯分羈省監一面仍行熬訊聽候部議供招咨部

謹

奏奉

硃批刑部議奏

容安謹案旋經刑部議覆如所議辦理奉

旨依議

嘉慶二十年十二月二十一日

奏爲分別具奏請

旨事竊查石佛口等處王姓傳教一案臣正在遵

旨嚴審定擬間據清河道韓文綺委員在石佛口二里許

之圍峯山壽峯寺內查有皇極金丹九蓮真信版

真還鄉寶卷一部共二本檢閱經內以無極太極

皇極爲三教有九蓮如意及過去未來眞空無生
九宮八卦青陽紅陽等字樣散敘經內並有無影
山之語臣憶及從前逆犯劉之協案內卽傳聞無
影山遍訪未確茲據稟稱訪之該處土人咸稱圍
峯山卽呼爲無影山壽峯寺係王姓昔年所建香
火廟是王書魯在江南所供經卷卽指此經而王
姓累代傳教仿照此經編造三教應劫分掌天盤
等邪說煽惑騙誘實爲各項邪教輾轉附會之宗
毫無疑義謹粘簽封呈

御覽此案現已遵

首嚴行審訊分別定擬另摺具

奏除例應緣坐之王秉鈞王交泰王漢倬王訓王榮奎
王和王朝萬王奎子及被誘入教應發回城之申
明田元隴王日平王日安劉煥杜立功藺朝元徐
科何永言閻芝等人數衆多仍羈省監臣督同臬
司盡心研究仍加熬審有無逆跡及各要犯切實
下落毋庸解部外其傳教爲首之王殿魁王興建
王亨仲王時玉四犯遵派藩司錢臻解部覆審並
將存有邪經之王克勒及應質要証郭大舉二名
一併交藩司錢臻解部備質仍飭原問之保定府

知府阿霖及順德府同知姚嗣懋率同候補知縣
壽澗章隨同分起解送請

旨俟刑部審明議覆後仍令錢臻押解王殿魁王興建王
亨仲王時玉四犯赴石佛口地方盡法辦理分別
傳首犯事省分梟示以彰

國法而警頑愚至遷徙王姓人數不少亦應大員督率
辦理卽飭錢臻前往會同清河道韓文綺督率地
方官逐細確查妥辦迅速分起解省核辦並抄追
房產入官至臣展荷

聖明指示查辦此案節經檄行司府惟恐稍有縱漏臬司

盛泰總核精詳保定府知府阿霖悉心研鞫該司府等均係上年九月以後到任現在查明發審辦結教案及奏咨各案三百五十餘起統計現在省城三監所存人犯僅有一百七十八名囹圄清楚實由該司府等無分寒暑晝夜督審不辭勞瘁是以要案均能妥速完結人証亦無羈押株累審案原係臬司首府應辦之事但該司等格外認真其微勞亦不可壅於

上聞查臬司盛泰曾隨臣在軍營訊案極其留心此案之根據分明實由該司最爲詳確彼時臣未敢請

賞花翎至保定府阿霖前辦湖北軍務得有花翎緣事拔去可否仰懇

皇上天恩將臬司盛泰保定府知府阿霖均

賞戴花翎之處出自

逾格鴻慈其查拏審訊各員除僅係隨同辦理者毋庸置議外饒陽縣知縣陳晉候補知縣壽澗章首先審出實情辦理全案始終出力請

旨賞給陞銜拏獲各犯之遷安縣知縣汪本磁州知州何道榜靈壽縣知縣高蔚溶邯鄲縣知縣尹鴻璐樂城縣知縣徐志祖雄縣縣丞陳于嘉均請

旨交部議敘額外外委蘇永泰係臣密派帶眼查拏人犯

之弁均能按名拍拏起出邪書尙爲得力請

賞給把總臣衙門書吏朱堂戴振宗二名均因辦理軍需

稿案出力經臣奏請將朱堂

賞給從九品職銜戴振宗咨部照繁缺之例掣選該吏等

現復承辦此案晝夜辛勤奮勉請

旨均免其考試歸部卽選以示鼓勵再查現獲各犯該地

方官會同購拏不遺餘力審明多係歷年外出傳

教及從前被誘習教之犯各該地方官文武失察

在先例有處分惟現在正當緝捕緊要之時若一

經獲犯究出案內歷年失察地方官先與懲處人
人顧忌處分轉致懈於緝捕卽如直省前辦大
教金丹教等案事非一年官非一任迄今尙奉部
查取失察職名雖係咎所應得但各該地方官卽
畏失察之嚴議必懈目前之緝捕節經欽奉

諭旨如河南拏獲紅鬍子等案均

格外恩施寬其既往之愆予以自新之路合無仰懇

聖恩將現獲各犯歷年文武失察處分概行

寬免各該地方官等感沐

鴻施益當奮勉圖報於緝捕事宜加倍認真實屬大有裨

益謹

奏

嘉慶二十年二月二十三日奉

上諭那彥成奏請將承審石佛口王姓傳教惑衆一案之
臬司知府等量予鼓勵並請免厯任文武失察處分一
摺臬司盛泰知府阿霖承審要案盡心研鞫盛泰著加
恩賞戴花翎仍賞加一級阿霖著加恩賞還花翎仍賞
紀錄二次其首先審出實情辦理全案出力之知縣陳
晉壽潤章俱著賞給六品陞銜拏獲各犯之知州何道
榜知縣汪本高蔚溶尹鴻璐徐志祖縣丞陳于嘉俱著

交部議敘起出邪書之外委蘇永泰著以把總陞用書吏朱堂戴振宗俱著免其考試歸部以應選之缺卽選以示鼓勵至此案歷年旣久今已全行拏獲懲辦所有歷任失察各犯文武員弁應得處分著加恩概行寬免該部知道

嘉慶二十一年二月二十五日

奏爲查辦世傳邪教之王殿魁等案內應行緣坐親屬及遷徙戶口分項擬發事竊查灤州匪犯王殿魁等世代踵傳邪教惑衆案內應行緣坐親屬及遷徙戶口一案先經臣緝獲石佛口安家樓等處傳

教之王殿魁王興建王亨仲王時玉等四犯並將
已故傳教之王廷俊王允恭王喜王三省王度并
子王逢太王紹英王景益王烈等九犯及已獲王
烈之子王秉均王度之子王交太王喜之子王漢
卓王景益之子王訓王亨仲之子王奎榮王和王
殿魁之子王朝萬王奎子八犯又石佛口未經習
教之該姓族人王際昌王殿卿王鳳吉分別問擬
凌遲戮屍梟示發遣遷徙奏奉

諭旨勅部核准施行並聲明此外應行緣坐及應行遷徙
各犯家口卽令藩司錢臻前往灤州宣龍縣查明

解省核辦均經奉

旨依議欽遵辦理去後嗣據該州縣先後解到各男婦徽
司督同首府逐細研鞫據各堅供並無脅勒等情
查律載大逆正犯之祖父子孫兄弟及伯叔父
兄弟之子並正犯母女妻妾姊妹子之妻妾皆緣
坐又嘉慶十八年奏定章程叛逆案内例應緣坐
男犯年十六歲以上者發新疆給官兵爲奴其律
應分給功臣之家爲奴之女口因係謀逆教匪家
屬未便容留京師致滋萌孽應發往省分較遠之
福建廣東甘肅四川等處駐防仍照新例分賞該

處官兵爲奴其年未及歲之幼孩應令該犯屬攜帶配所一併爲奴等語又二十年二月初六日欽奉

上諭緣坐女犯內學習邪教者發烏魯木齊給官兵爲奴欽此欽遵在案今王殿魁等世代踵傳邪教惑眾案內緣坐及遷徙各犯業經訊明並無習教情事均應分別照例辦理惟現訊各家屬內有緣坐婦女應行發往福建等省駐防爲奴因子女幼小情願隨夫及子發遣新疆爲奴者亦有緣坐兄弟之妻子因不應緣坐仍應遷徙各婦女情願跟隨夫

男發遣新疆者核與原奉定例均屬不符第此案
係比照大逆律擬罪尙與實犯反逆者不同似應
量爲權變以示區別除正犯嫡派子孫妻妾仍照
緣坐例擬發外其兄弟叔姪應請改爲遷徙雲貴
兩廣地方安插至緣坐婦女例應分發福建廣東
甘肅四川四省給駐防官兵爲奴訊明情願隨同
夫男發遣新疆者應請聽從其便業經兩司詳由
臣 谷部核示因查該族男婦大小戶口應遣應徙
共計一百餘名口現在羈禁省監多據稟報患病
自應速行起解以清囹圄所有原奏內經部議准

應發新疆給官兵爲奴之緣坐男犯八名除王朝
萬王奎子病故外尙有王秉衡等六名及現到之
王勤業等七名并應行擬發四省情願跟隨夫男
發遣新疆爲奴之緣坐婦女王鄭氏等二十五名
口又應行擬發福建廣東甘肅四川四省爲奴之
緣坐婦女王劉氏等十二名口又應行遷徙雲貴
兩廣分別安插之王加卓等九十九名口相應
奏明卽行分起發配謹分項繕具清單恭呈

御覽此內有現在生產患病之王李氏王魏氏王高氏王
吳氏王梁氏俟飭提到省再行發遣其外出在逃

之王珠兒王廣臣王景祥王佐弼王松齡王蔭槐
並現奉

諭旨飭令截拏之王泳太王九思王殿弼王弼現已嚴檄
各屬一體密行偵探並咨緝各省務獲另行辦理
各犯供出房地已據該州縣查抄估計其逆犯的
屬名下財產應行入官遷徙各犯名下產業共估
價銀一千四百二十九兩零應請先行全數官爲
墊給攜帶赴配俟變解後歸款並繕給咨牌分項
迅速起解仍造冊咨部謹

奏奉

硃批刑部議奏

嘉慶二十一年三月十七日

奏爲灤州王姓邪教案內之傳教要犯王泳太卽王三
顧及咨緝之王珠兒等俱經奉天省義州拏獲盧
龍灤州差役前往躡緝訪明確認據稟奏

聞事竊

臣

於本年二月二十二日承准軍機大臣字寄二

月二十一日奉

上諭據馬慧裕等奏審訊清淨門邪教首從一案據現犯
等供稱王泳太一犯在楚傳教多次此次於上年夏間
來漢陽並未久住旋即他往因編查保甲嚴緊無處容

留其在逃之王九思王殿弼王弼俱查無下落等語王
泳太等先經外出傳教此次辦理灤州盧龍王姓族衆
一節該犯等尙在未知現在外省無可容身自必仍回
直隸如到家後一聞該族衆俱經嚴辦必將遁跡遠颺
著那彥成預飭所屬在灤州附近一帶密行偵探如王
泳太等犯一經潛回卽行截拏並於經過州縣一體查
緝一經獲犯該督一面奏聞卽派委委員押解來京交
刑部審辦毋任漏網欽此查王泳太卽王三顧係王殿
魁等案內審係在湖北傳教要犯此外尙有王三
省之子王珠兒及遷徙項下闍家莊王居廣之子

王景祥王佐弼等與王九思王殿弼王弼等均經
臣奏明咨緝在案欽奉

諭旨飭令截拏又經臣派員分路偵探並嚴檄盧龍等州
縣密速購線查緝去後茲據永平府知府景慶稟
據盧龍縣知縣差役李謙亨灤州差役李士勇等
稟稱該役等奉批躡緝於二月三十日行抵義州
衙門掛號詢知王泳太即王三顧並王珠兒王景
祥王佐弼等四名業已拏獲彼時義州未奉飭緝
明文因係王姓同族一併獲住該役等知王泳太
即王三顧係傳教要犯離據實回明義州知州等

州隨與該役等查訊並令當堂識認委係王泳太
其人該州卽於三月初一日將王泳太同王珠兒
王景祥王佐弼等解赴瀋陽省城審辦等情該府
據稟咨查義州馳稟前來臣查王泳太卽王三顧
在湖北傳教多次與先經審辦之王殿魁等罪同
一律王珠兒王景祥王佐弼均係咨緝要犯既據
義州拏獲相應具

奏請

旨勅下奉天府尹卽將義州現獲之王泳太等四犯迅速
派員解交刑部審辦仍飭嚴緝王九思王殿弼王

弼等務獲辦理謹

奏

容安謹按此奏於

行在具遞已交部核辦

嘉慶二十一年五月十四日

奏爲拏獲灤州王姓案內之王殿弼遵

旨解部審辦事竊臣於本年二月二十二日承准軍機大

臣字寄二十一日奉

上諭據馬慧裕等奏審訊清淨門邪教首從一案據現犯等供稱王泳太一犯在楚傳教多次此次於上年夏間

來漢陽並未久住旋即他往因編查保甲嚴緊無處容
留其在逃之王九思王殿弼王弼俱查無下落等語王
泳太等先經外出傳教此次辦理灤州盧龍王姓族衆
一節該犯等尙在未知現在外省無可容身自必仍同
直隸卽到家後一聞該族衆俱經嚴辦必將遁跡遠颺
著那彥成預飭所屬在灤州附近一帶密行偵探如王
泳太等四犯一經潛回卽行截拿並於經過州縣一體
查緝一經獲犯該督一面奏聞卽派委妥員押解來京
交刑部審辦母任漏網欽此欽遵派員分路偵緝並嚴
檄盧龍等州縣密速購緝隨據奉天省義州拿獲

王泳太及王珠兒等四犯經盧龍灤州差役前往
躡明指認確實由該府等稟臣具

奏聲明飭緝王九思王殿弼王弼務獲節經檄催去後
茲據灤州知州王仲湘稟稱州役持批躡至吉林
地方訪得王殿弼踪跡當卽稟知吉林理事廳添
差協同將王殿弼拏獲卽由該廳備文押解到州
訊據供稱係石佛口莊人年二十七歲伊父王老
澤已故伊母李氏伊兄王殿臣伊妻張氏並無子
女伊於嘉慶十六年間因貧前赴關東在伯都訥
孤榆樹一帶傭工度日今年三月內到吉林地方

尋找工作卽被拏獲伊並無習教傳教情事等語

具稟前來

臣查王殿弼係奉

旨飭緝要犯既經該州差役跪至吉林拏獲所供並未習
教傳教殊難憑信相應遵

旨奉

聞一面派員押解王殿弼赴京交刑部審辦除再勒緝王
弼王九思務獲外

臣

更有請者各路躡緝案犯均

關緊要必須各地方官不分畛域和衷妥辦庶緝
捕更易得力現在嚴緝要犯直豫東三省襄界錯
雜尤宜協力共濟

臣

與陳預方受疇和衷相商節

次密札來往互相知會各自諄劄毗連州縣官齊心努力無如各該屬及派委員弁等多半意存爭攘往往多事卽如現在開州等會拏王萬林一案委員周邦憲等卽有架詞邀功之稟臣現又嚴劄分飭各路員弁務期痛改積習和衷濟事以期早獲要犯此次吉林理事廳一經灤州差役稟知王殿弼踪跡該廳卽添差協同拏獲並備文解灤實屬不分畛域可否請

旨勅下吉林將軍查明將該廳交部議敘以示獎勸之處
出自

聖主天恩灤州知州王仲湘實力躡捕容存記俟再緝
獲要犯另請鼓勵謹

奏

嘉慶二十一年五月十六日奉

旨王殿弼一犯著解交刑部審辦其協同獲犯之吉林理事同知著富俊查明該員如果出力咨部照例議敘

那文毅公初任直隸總督奏議卷四十二